

四庫全書

集部

欽定四庫全書

集部

北海集卷七至九

詳校官石中允臣薩敏

主事臣呂雲棟覆勘

謄錄監生臣俞光豫

欽定四庫全書

北海集卷七

宋 綦崇禮 撰

制

除韓世忠持授太尉依前武成感德軍節度使
神武左軍都統制福建江西荆湖南北路宣撫
副使加食邑食實封制

門下司勳等戰功之目別庶績以稱多太尉掌武事之
官視羣公而為重朕若稽周典叅酌漢儀肆酬良將之

勞用冠元戎之號誕揚明命敷告大庭檢校少師武成
感德軍節度使神武左軍都統制福建江西荆湖南北
路宣撫副使南陽郡開國侯食邑二千戶食實封七百戶
韓世忠鷙決有謀驍雄無匹馭軍得士優兼程李之能
臨敵乘機自合孫吳之法身更百戰勇蓋一時積勲伐
以居多席寵名而加厚昨屬閩湘之擾欲嚴斧鉞之誅
受命不辭俾副宣威之任成功可必果諧注意之求航
海道以濟師環賊巢而擣壘神兵天下惡黨盡殲毆狗

鼠以無餘撫方隅而悉定捷書來上旰食為寬方奏凱
以北旋遂移軍而西指威聲既震叛衆亦降雖功不自
言益見賢能之節而事當貴信可忘懋賞之規還几棘
之上儀假五兵之重柄以侈有邦之典以隆上將之權
增衍戶封陪敦井賦併昭寵數用示眷懷於戲以德行
仁者王朕敢怠息民之志自上安下曰尉爾其思勘亂
之圖雖內寇之略平顧外虞之未靖尚勤乃力勿替前
功可特授太尉依前武成感德軍節度使神武左軍都

統制福建江西荆湖南北路宣撫副使加食邑五百戶
食實封二百戶封如故主者施行

除韓世忠特授開府儀同三司依前武成感德
軍節度使神武左軍都統制充淮南東西路宣
撫使加食邑食實封制

門下朕負斧戣而慚域中之尊孰與慰普天之望披輿
圖而懷闡外之慮其惟先推轂之求乃眷虎臣久從戎
事高勲當報茲隆開府之儀大任存更式倚干城之略

誕揚渙號敷告治庭太尉武成感德軍節度使神武左
軍都統制充淮南東西路宣撫使南陽郡開國公食邑
二千五百戶食實封九百戶韓世忠英勇冠軍純誠許
國摧鋒陷陣績屢載於旂常受命忘家心靡渝於金石
頃宣威令往殄寇攘樓船南下而甌粵為清雖嘗舉褒
崇之典鐵馬西馳而荆湘繼定顧未酬俊偉之功屬已
盛秋方營一作勞嚴戍庫頗居國詎容鄰壤之加兵李勣
守邊遂致敵人之遠塞少稽信賞及此移屯維江表之

藩籬任淮壖之屏翰招徠失業務綏撫於凋殘備禦不
虞要防閑於侵軼爰資宿望用折遐衝貴絕右班既典
五兵之重寵仍雙節其聯三事之華予惟必踐於前言
爾尚克圖於來効載陪多賦加食真封并昭進律之常
庸示旌功之勸威嚴夙著信草木之知名號令增新見
旌旄之動色繫中權之有賴庶外侮之自消於戲輔周
則國必強輕敵損威者惟汝之戒將能而君不御臨機
制勝者惟汝之為顧方略之如何期功名之未艾往服

予訓母隳乃成可特授開府儀同三司依前武成感德
軍節度使神武左軍都統制淮南東西路安撫使泗州
置司加食邑五百戶食實封三百戶主者施行

除朱勝非特授依前左宣奉大夫守尚書右僕
射同中書門下平章事兼知樞密院事加食邑
食實封制

門下朕戒懼多虞疇咨良輔維持左右繫吾二相之協
心推輓後先豈予一人之獨濟念得賢則國之福而知

人者帝所難懲亟易之徒煩蓋嘗輕用於新進懷老成之往効曷若登庸於舊勞爰即治朝誕揚明命觀文殿學士左宣奉大夫提舉萬壽觀兼侍讀義陽郡開國公食邑二千五百戶食實封七百戶朱勝非閔深而端亮敦大而疏通陳平之智有餘如晦之才能斷從予初載蚤宣力於要津嘉乃一心遂奮庸於宰路駭巨姦之竊發覲神器而莫搖獨倚精忠陰摧元惡馴豺狼之暴而事無遺策卒銷沮於兇謀翊簾帷之政而人靡間言旋復

還於明辟成功不處巧語佞興嗟去位之累年殆謗書
之盈筐朕追原曩事彌想話言惟當軸者三旬豈遠猷
之能究爰賜環而屢命趣舊德以來歸再覲儀形益新
啟沃雖從容經幄期入奉於諮詢而密勿巖廊盍同寅
於康濟乃還升於右揆仍兼秉於中樞增衍封租併隆
寵渥以慰具瞻之素以彰注意之誠於戲謝安未起而
心已係於蒼生蓋大臣之重輕在望裴度既還而威復
行於河朔則朝廷之得失以人顧予共政之賢時乃同

功之舊庶幾茲美無愧前聞其戮力於我家俾有辭於
永世可特授依前宣奉大夫守尚書右僕射同中書門
下平章事兼知樞密院事加食邑一千戶食實封四百
戶封如故主者施行

除呂頤浩特授依前尚書左僕射同中書門下
平章事兼知樞密院事都督江淮兩浙荆湖諸
軍事

門下承天子而裁萬化入則斷國論於一堂位冢宰而

總六師出則折遐衝於諸夏欲並注安危之兩意顧莫
先文武之兼資雖三公在朝協濟經邦之任而一相處
內宜存分陝之規屬我元臣誕揚丕號特進尚書左僕
射同中書門下平章事兼知樞密院事文安郡開國侯
食邑五千五百戶食實封一千八百戶呂頤浩高明而
篤實剛毅而恢闊學推齊魯之英氣稟山河之粹達於
權而知變更劇易之百為勇於義以奮忠挺險夷之一
節慷慨而安神器勤勞而又王家名動華戎勲高廟社

自再登於揆路實首執於事樞房杜同功每推權而不
吝蘇宋共政蓋相得以其歡方內治之交修顧外夷之
孰禦深軫納溝之慮備陳多壘之憂謂翫歲苟安非拯
溺救焚之意且待時自定豈興衰撥亂之圖請以身先
願為衆倡朕念國步迭遭之滋久邦基艱危而靡寧警
蹕屢遷藩籬莫固徒得君重果為朕行矧黃裳佐唐專
決用兵之筭而王導輔晉嘗兼都督之稱是用獨委戎
旃并提相印董師于於八路仍魁柄於中朝盡長江表

裏之封悉歸經畧舉宿將王侯之責咸聽指揮庶宣暢
於威靈用拊寧於方域陪敦邑賦昭示眷懷鼎鉉不移
式係蒼生之望旌旄所向正需元老之功於戲內惟張
仲之賢吉甫之行何遠上若憲宗之斷裴度之功乃成
朕固披勿貳之衷汝亦有同心之助藉虞攸託中外實
均徃揚屬於天聲佇恢隆於宰業惟我耆德豈煩訓詞
可特授依前尚書左僕射同中書門下平章事兼知樞
密院事都督江淮兩浙荆湖諸軍事加食邑一千戶食

實封四百戶封如故主者施行

除呂頤浩特授鎮南軍節度使開府儀同三司
提舉臨安府洞霄宮加食邑食實封如故制

門下王者崇德以報功務極始終之遇君子難進而易
退要明去就之宜若時元臣久秉魁柄方切仰成之意
遽披引疾之辭爰錫徽章誕敷羣聽特進尚書左僕射
同中書門下平章事兼知樞密院事領江淮荆浙都督
諸軍事文安郡開國公食邑五千五百戶食實封二千

二百戶呂頤浩才周萬變望折遐衝奮不顧身仗天戈而濟難忠以衛上扶日轂以安行誼動神明功存社稷用再登於台鼎茲繼閱以星霜主調陰陽覲天心之克享典正法度期王化之復行備觀夙夜之勤莫測災祥之異駭人言之歸咎指國政之失平朕則責躬卿胡辭位覽疊陳於懇款良感予懷欲終保其功名重違乃志始解鈞衡之極任還兼將相之崇資擁節舊邦奉祠閒館蓋閔勞於機務庶均逸於耆英於戲從赤松之遊卿

豈遽遺於世事申丹書之信朕將差定於勲盟尚勉令
猷永膺遐福可特授鎮南軍節度使開府儀同三司提
舉臨安府洞霄宮食邑食實封封如故主者施行

除秦檜特授觀文殿學士提舉江州太平觀依
前通奉大夫食邑食實封如故任便居住制

御筆檜作執政日范宗尹為相凡有未盡善事未嘗與
宗尹爭議每事私言於朕宗尹既罷去則曰若用臣為
相有聳動天下事既而獻二策一則與南北士大夫通

致家信一則糾率山東河北散羣之人願歸鄉土者差
官管押前去此何理哉近除權邦彥朱勝非皆面從而
稱善退而與其黨力攻之可謂大臣歟

門下王者循至公之道常加厚於股肱大臣高易退之
風欲曲全於體貌維時次輔茲解近司式頒上印之恩
誕布告庭之命左通議大夫守尚書右僕射同中書門
下平章事兼知樞密院事提舉修政局江寧郡開國公
食邑二千四百戶食實封八百戶秦檜蚤矜志行歷蹈

難危謂其盡節以事君可膺大用嘉乃脫身而歸國實
慰羣情擢置巖廊俾叅柄任自初豫政疑若獻忠從其
長則未嘗爭議於當然私於朕則每獨指言其不可遂
令代相倚以為邦務推勿貳之誠庶盡欲行之志自說
得權而舉事當聳動於四方逮茲居位以陳謀首建明
於二策罔燭厥理殊乖素期念方委聽之專更責寅恭
之効而乃憑恃其黨排根所憎進用臣鄰率面從而稱
善稽留命令輒陰誅以交攻宣實汝心殆為衆誤顧竊

干於威柄慮或長於姦萌方悉屏除尚圖改事遽辭機
政屢卻封章詔諭莫回留挽難强爰陞華於秘殿仍賦
祿於殊庭以示優容以昭眷遇於戲予奪在我豈云去
朋黨之難始終待卿斯無負君臣之誼往膺渙渥勿替
令猷可特授觀文殿學士提舉江州太平觀依前通奉
大夫食邑食實封如故主者施行

除潘正夫特授檢校少保依前昭化軍節度使
駙馬都尉充醴泉觀使加食邑食實封封如故

制

門下朕跡滯東巡心勞北顧痛念宗親之衆既倉猝以
偕還瞻言姑姊之倫今間關而幾在欲厚天潢之澤敢
遺戚畹之良稽用邦彝誕孚廷渙昭化軍節度使駙馬
都尉充醴泉觀使河南郡開國公食邑二千四百戶食
實封六百戶潘正夫溫恭而好禮文敏而敦詩選由勲
閥之高起席副車之貴一門二主締連雲月之光歷歲
兩朝霑被神明之渥載惟吳國實出秦陵蚤承寧德之

歡視同己子晚託昭慈之愛情若自生曾靡他人獨茲
一女屬遭變故久嘆流離喜綠綬之來朝奉需章而有
請謂爾建旄之舊未沫殊恩當予踐祚之初嘗陳忠奏
興言往事良感朕心宜加錫於寵章庶少酬其志望通
旌夏篆俾叅亞保之華大纛高旌不改元戎之物仍陪
租食并示眷懷朕方兼賴於親賢爾其長保於福祿於
戲以列侯而尚主允侔漢戚之尊曰三孤而貳公遂擬
周官之盛益勉貴驕之戒用昭譽處之休可特授檢校

少保依前昭化軍節度使駙馬都尉充醴泉觀使加食邑五百戶食實封二百戶封如故主者施行

除孟忠厚特授依前起復鎮潼軍節度使開府儀同三司充醴泉觀使特封信安郡王加食邑

食實封制

門下朕永懷先后克保冲人禮盡三年既徹几筵之奉澤加九族難酬社稷之功維時姑姪之賢宜極侯王之貴誕揚徽冊敷告治廷起復鎮潼軍節度使開府儀同

三司充醴泉觀使東海郡開國侯食邑一千五百戶食
實封七百戶孟忠厚好學有聞立朝無玷地兼居於賢
戚躬自勵於材猷儀於從班茂獻納論思之益建茲戎
節聞詩書禮樂之言避遠要權從容閒館方倚廬之銜
恤屬中壺之纏哀窆祔甫終嘗奪苴麻之制褒崇已盡
併聯袞黻之華及此祥除稽諸典故痛念音容之邈遂
隔中天欲隆骨肉之恩莫如裂地乃相三吳之會肇開
異姓之封載考濟陽之始王雖由元舅顧如隆祐之盛

烈特鮮近親蔽於朕心用作爾祉疇其多戶衍彼爰田
以侈大於私門庶尊安於帝室於戲樊宏著戒明天道
之好謙陰興遺辭欲后宗之知退追維慈訓常抑貪求
其孰慰在天之靈將爾實保家之主往祇茂典益勉令
名可特授依前起復鎮潼軍節度使開府儀同三司充
醴泉觀使特封信安郡王加食邑五百戶食實封三百
戶主者施行

除占城國王楊卜麻疊特授依前檢校太傅使

持節琳州諸軍事琳州刺史充懷遠軍節度使
琳州管内觀察處置等使兼御史大夫占城國
王加食邑食實封散官勲如故制

門下朕采汶上之儀因省方而饗帝授泰元之策斯斂
福以錫民歡欣既洽於羣臣慶施遠周於四海載頒顯
命以逮殊邦懷遠軍節度使琳州管内觀察處置等使
琳州刺史上柱國占城國王食邑六千戶食實封二千
五百戶楊卜麻疊氣稟純和性資忠壹介南溟而有國

世蒙零露之多濡謹北面以稱藩蚤識烈風之不作庭琛屢貢爵典荐加建大將之高牙視三公之極位王靈滋至侯度益恭屬展采於宗祈既成釐事顧廣恩於祭澤可廢彛章乃增衍於爰田并倍敦於真食以侈精禋之貺以昭順節之褒於戲崇德報功朕則靡遐遺之間嚮風慕義爾其堅內附之誠徃對龐禧永綏厚祿可依前檢校太傅使持節琳州諸軍事琳州刺史充懷遠軍節度使琳州管內觀察處置等使兼御史大夫占城國王

加食邑五百戶食實封二百戶主者施行

除闍婆國王悉里地茶蘭固野特授依前檢校
司徒使持節琳州諸軍事琳州刺史充懷遠軍
節度使琳州管內觀察處置等使兼御史大夫
闍婆國王加食邑食實封散官勲如故制

門下朕省方近國適當三歲之親祠展采合宮咸做九
筵之往制玉帛交薦籩豆駮奔輯曠禮以涓成委鴻休
而來假肆推慶施用軼縣區懷遠軍節度使琳州管內

觀察處置等使金紫光祿大夫檢校司徒使持節琳州
諸軍事琳州刺史兼御史大夫上柱國閩婆國王食邑
三千四百戶食實封一千四百戶悉里地茶蘭固野性
質溫恭天資誠順宅海邦而有衆自矜樂土之饒嚮天
闕以觀光夙起華風之慕束帛屢至爵服載盼地雖隔
於域中心每傾於日下屬修元祀普洽湛恩維顯相之
勞嘗已加於羣后念來臣之舊澤宣問於遐方即六纛
之前儀仍三槐之故秩衍之多戶倍以真封併為裔土

之光式廣吳穹之祐於戲寵均列辟曾無內外之殊居
限重溟宜識朝宗之誼往綏蕃祉以永令名可特授依
前檢校司徒使持節琳州諸軍事琳州刺史充懷遠軍
節度使琳州管內觀察處置等使兼御史大夫閭婆國
王加食邑五百戶食實封二百戶散官勲如故主者施
行

觀文殿學士可除宣武軍節度使制

門下朕躬履艱難志圖興復念兩宮之遠播久廢晨昏

勞七萃以時巡屢淹歲序眷我上都之鎮倚予耆德之
英輟領從官往護諸將誕揚廷號用聳朝紳具官某性
稟高明氣充剛大直躬山立去來肯徇於麾招夷量淵
渟清濁罔渝於澄撓徧履禁嚴之地備聞獻納之言延
置疑丞叅陪政事同心謀國方切仰於忠嘉引疾乞身
遽請均於勞逸重違冲節俾解繁機顧精神有賴其折
衝且威望可資於鎮俗雖秘殿耆儒之選足奉諮詢而
浚郊節制之權方圖居守爰寵齋壇之重用增留鑰之

嚴慨念京都隔茲戎馬糧道梗於饋餉廩乏見儲農畝
廢於耕桑野多餓殍守禦疲荷戈之苦更番困行路之
難闌閨蕭條問閭愁歎軫予憂顧藉爾撫寧矧九廟之
主未遷而二聖之狩猶遠宮闕虛而不守宗族散而莫
收痛在朕躬咎將誰執念已逼防秋之際正欲圖諸夏
之安往激勵於貔貅以驅攘於蛇豕於戲聽鼓鼙而思
將帥朕方倚重於戎昭如子弟之見父兄汝其務充於
人望繫我舊弼豈煩訓詞可

欽定四庫全書

北海集卷八

宋 綦崇禮 撰

詔

討罪誠飭詔

門下朕臨朝不怡視古太息為民父母未免兵革之憂
俾我黎元重罹盜賊之患蠢茲閩越之衆竊弄潢池之
兵頻年內侵百姓倣擾朕念方隅之弗率悼赤子之無
辜申命爾臣肅將師律戎車既飭元惡自焚嶺海底平

民夷綏服乃眷傷殘之壤備聞愁歎之聲誅求繁多徧於百室力役勞苦甚於三時雖蠱蜺已除震於方外之寇而瘡痍未起愧此瘠土之民豈無曠恩用錫爾祉其開舊染之俗一洗庶戮之愆於戲討罪示威雖爾有辭於罰好生惡殺推朕不忍之心

回賜高麗國王陳奏詔

詔高麗國王省所上表陳奏事具悉朕省方南國通道東藩載嘉享上之恭重有觀光之請歸時事於宰旅將

效勤誠會諸侯於塗山更慚寡德爰即乘輿之所幸以
須信使之來庭顧秋塞馬肥或戒嚴之未暇而春潮舟
穩庶利涉以無虞往體至懷永堅素節所差下奉使韓
桂尹彥植候明年春暖起發於臨安府受禮故茲詔示
想宜知悉夏熱比安好遣書指不多及

回賜高麗國王起居詔

詔高麗國王省所上表起居事具悉夙奉藩儀遠馳函
奏恪致謹時之問益彰好禮之風披閱以還歎咨無斁

故茲詔示想宜知悉夏熱比安好遣書指不多及

回賜高麗國王進奉方物詔

詔高麗國王省所上表進奉方物事具悉梯航阻遠方
咨信使之期器幣錯陳先備土毛之奉載觀華腴益見
恭勤豈無好贈之儀用示寵嘉之意今回賜并特賜禮
物具如別錄至可領也故茲詔示想宜知悉夏熱比安
好遣書指不多及

賜叅知政事席益生日詔

求賢自輔方登間世之才維嶽降神適屆始生之日往
助家庭之慶用頒醪餼之儀既舉邦彞併為親壽今賜
卿生日羊酒米麴等具如別錄至可領也故茲詔示想
宜知悉

賜開府儀同三司嗣濮王冲湜生日詔

貴襲王封尊先屬籍袞衣而聯三事特隆同姓之恩蓬
矢而射四方載喜始生之日宜加寵賚以介壽康今賜
卿生日羊酒米麴等具如別錄至可領也故茲詔示想

宜知悉

賜太尉定江昭慶軍節度使神武右軍都統制

張俊生日詔

任掌五兵儀肩二府國倚良將久宣衛社之勞天生異材載遇垂弧之旦宜致饗餼之饋用綏壽祉之休今賜卿生日羊酒米麵等具如別錄至可領也故茲詔示想宜知悉

賜鎮潼軍節度使開府儀同三司充醴泉觀使

孟忠厚生日詔

望冠親賢位隆將相屬祥麟之感夢美喬嶽之鍾靈可
無牢餼之頒用助家庭之慶今賜卿生日羊酒米麵等
具如別錄至可領也故茲詔示想宜知悉

賜新除尚書右僕射同中書門下平章事朱勝
非生日詔

蕭昂儲精申嵩稟粹巨川待濟再膺舟楫之求吉夢獻
占猶記熊羆之兆維忠與孝宜壽而臧爰分生餼之儀

金匱要略卷八
用助家庭之慶今賜卿生日羊酒米麵等具如別錄至可領也故茲詔示想宜知悉

賜尚書右僕射范宗尹生日詔

降神在旦賚弼告祥助慶私庭備醪醴餽牽之錫輸忠
王室佇鹽梅麴蘖之和往服寵章式蕃壽祉今賜卿羊
酒米麵等具如別錄至可領也故茲詔示想宜知悉

賜簽書樞密院權邦彥生日詔

儲神駿嶽列輔鴻樞方資借箸之謀適慶垂弧之旦宜

加寵錫用介禧祥今賜卿生日羊酒米麵等具如別錄至可領也故茲詔示想宜知悉

賜端明殿學士左朝奉大夫江南西路安撫大使兼知洪州趙鼎赴行在詔

勅趙鼎卿以忠純無隱鯁亮不回之操張明綱紀風憲為尊密勿樞機話言猶在頃就閒於真館荐倚重於藩符政治羣情軍民各得其所威聞四境盜賊不窺其封惟顯績之既彰知遠猷之可賴肆更召節趣奉覲圭朕

方渴想於儀形卿亦得披其心腹行無俟駕寧辭趨命之勞見不以時佇副虛懷之訪已降指揮權交安撫大使司職事并州事曾紆詔書到日可乘遞馬速疾起發赴行在奏事故茲詔示想宜知悉春暖卿比安好遣書措不多及

賜新除起復左宣奉大夫守尚書右僕射同中書門下平章事兼知樞密院事朱勝非赴行在

詔

勅朱勝非卿任居次輔時許真賢對秉國鈞方賴有為
之助去丁家難遽興何怙之悲自即倚廬遂虛大府念
同心相與而共吾事維二三臣其一日不可以遠朕躬
如左右手禮既更於卒哭義斯得而奪情矧金革多虞
固有從戎之志而邦家大計難伸行服之私乃孚號以
揚庭俾輟哀而居位尚其趣駕副此虛懷已起復卿左宣
奉大夫守尚書右僕射同中書門下平章事兼知樞密
院事詔書到日卿可乘遞馬疾速起發赴行在故茲詔

示想宜知悉秋熱卿比平安好遣書指不多及

賜檢校少保定國軍節度使知樞密院事張浚
赴行在詔

勅張浚卿道可濟時誠維許國發心忠誼偉社稷之元
勲資其智謀勤封疆之遠役數摧巨敵獨歎賢勞爰俾
遄歸復還近輔董戎旃而在外固分一面之憂執樞柄
以居中斯展四方之畧卿既得行其雅意朕方有賴以
成功矧久渴於儀刑將大披於心腹佇期燕見式罄嘉

猷載惟趨命之恭備歷征途之苦體茲深眷毋憚疾驅
已降指揮召卿依舊知樞密院事詔書到日卿可疾速
赴行在供職故茲詔示想宜知悉秋熟卿比安好遣書
指不多及

賜檢校少保定國軍節度使知樞密院事張浚
赴行在詔

勅張浚卿天挺傑材民瞻碩輔勤王入衛炳義烈之昭
明受命出師蹈艱虞而慷慨宣威數路閱歲四遷緬懷

社稷之功久渴廟堂之論與其伐將帥之事徒畢力於
邊陲曷若歸丞弼之聯俾訂謨於帷幄肆頒名節還總
中樞庶協濟於遠猷以紹隆於大業山川云邈次舍良
勤尚其疾驅副此虛竚已召卿知樞密院事詔書到日
卿可乘遞馬疾速赴行在故茲詔示想宜知悉冬寒卿
比安好遣書指不多及

賜川陝宣撫使司張浚詔

勅川陝宣撫使司省所奏金人四太子自領北點刷甲

軍前來鳳翔府聚集諸路黨軍叛將取道攻取和尚原
決謀入川作過三月三日據吳玠申二月二十一日金
人四太子與皇弟郎君引領萬戶千人酋首七十餘人
率大軍十餘萬前來仙人關殺金平野塞壘連珠扎硬
寨四十餘座於二十七日一擁前來冲撞官軍血戰三
十餘陣又於二十九日番兵來攻擊官軍營寨我軍併
用神臂弓施放砲石打死番兵無數又於三十日甲軍
十餘萬一擁前來攻擊營壘官軍迎敵殺退金人博勒卓

別添生兵再來攻擊五十餘番及推擁洞子數十座雲梯三百座一發搭上城角官軍戮力向前捍禦用砲石打折洞子并用杆撞折雲梯金人不能上城鏖戰一百陣殺死金人萬戶千戶并軍兵莫知其數大獲勝捷又奏續據吳玠申金人屢敗終未退師遂於三月一日夜遣將兵剗動金人寨鏖戰直至天明殺敗番衆傷折無數官兵占奪得番兵前寨并奪到傍牌袞槍鞍馬旂幟不少番兵退却寨柵委獲勝捷又三月二日夜三更以

來刦破四太子皇弟郎君大寨使首尾不能相捄拔寨遁走見遣諸頭項官兵追襲痛行掩殺前去委是大獲勝捷臣等已行下吳玠取索功狀奏聞事具悉自秦關失險蜀道戒嚴寇嘗及於梁洋未能得志兵益出於岐隴曾靡悛心乃哀番漢之師直犯金湯之阻吳玠夙高將畧預料敵情據地利於要衝不守已陳之迹感人心於忠義遂收必勝之功三捷以聞六師增色緊撫和之有素肆指縱以無前載嘉却敵之勞方叙策勲之典往

稽厥實亟上於朝庶賞不至於踰時而士克勸於用命
詔書到日可疾速聞具吳玠等功狀報明聞奏故茲詔
示想宜知悉

賜新除江東淮西路宣撫使劉光世詔

勅光世朕惟吳越之區既留警蹕江淮之險宜植藩籬
顧貴池姑熟之津直下蔡歷陽之會接九江之衝要臨
建業之上游分宿重兵是資偉望眷予勲舊深體艱虞
聞指意以具孚請從移戍馳封章而來上曾靡告勞卿

能若斯朕復何慮載嘉恭順深動歎咨惟孝於親則必
揚後世之名惟忠於君則當徇公家之念此中外安危
之計屬卿二三將帥之臣情若弟兄毋蓄閭閻之怨義
均寮案共輸許國之誠所期戮力以同心用克折衝而
禦侮丹青不朽將並列於雲臺帶礪弗渝亦咸書於盟
府乃所望也豈不韙歟已除卿江東淮西兩路宣撫使
池州置司故茲詔示想宜知悉秋冷卿比平安好遣書
指不多及

賜宇文虛中詔

勅虛中潘致堯等回得丞相都元帥書於國家事情甚厚諒卿為我懇請多矣且知家信已達卿所足慰乃懷我之區區計今大國所能深悉肆遣同簽書樞密院韓肖胄工部尚書胡松年再往計議二臣者國家任用已久卿之所知非新進小臣比臨遣之日皆遣授詞庶幾足以取信必獲嘉報惟卿忠亮之節孚於上下其亦為我極陳而力贊之尚其綏鎮副此傾佇今賜卿銀綾絹

茶等具如別錄至可領也故茲詔示想宜知悉夏熱卿
比安好遣書指不多及

賜新除鎮江府建康府淮南東路宣撫使韓世
忠詔

勅世忠朕惟時以戒寒守當嚴備循江流而鎮險顧力
散以難周聯形勝以宿師則勢專而易應眷昇潤東西
之府據江淮南北之衝走集所趨舳艫交會封疆之接
雞犬相聞曾無數舍之遙奚假兩軍之重乃命江東之

戍更涖池陽遂因京口之屯並臨建鄴仍資威望分控
長淮惟卿勇不顧身忠無擇事寬其分部庶能展足以
赴功睦乃比鄰尚克同心而濟務念國家之至計繫將
相之協恭勉就大勲毋懷小忿譬猶捕鹿要為犄角之
圖有若戲斲皆獲公私之利徃體朕意佇觀厥成已除
卿鎮江建康府淮南東路宣撫使鎮江府置司故茲詔
示想宜知悉秋冷卿比平安好遣書指不多及

賜宇文虛中詔

勅虛中卿銜命出疆迨茲五載委身徇國曾靡貳心惟
忠不欺而信不疑肆彼無惡而此無讟備聞誠節深動
歎咨卿其益惟我宗社之圖朕豈少忘爾妻孥之恤慰
萬民之望行觀季友之來歸集二國之成寧復子卿之
久苦尚期自勉以副此懷今賜卿金銀綾絹茶具如別
錄至可領也故茲詔示想宜知悉秋冷卿比平安好遣
書指不多及

欽定四庫全書

卷八

欽定四庫全書

北海集卷九

宋 綦崇禮 撰

詔

賜門下分鎮詔

勅門下周建侯邦四國有藩垣之助唐分節鎮北邊無
夷狄之虞永惟涼眇之資履此艱難之運為黎元之父
母未能除喪亂之憂保宗社之土疆無以捄侵凌之患
遠巡南國久隔中原蓋因豪傑之徒各奠方隅之守是

用考古之制權時之宜畫野離疆咸就瓜分之勢折衝禦侮俾無尾大之嫌斷自荆淮接於畿甸豈獨植藩籬於江表蓋將崇屏翰於京都欲隆鎮撫之名為輟按廉之使有民有社得節制於境中足食足兵聽專征於閭外若轉移其財用與廢置其屬僚理或應聞事無待報維寵光之所被既並享於終身苟功烈之克彰當永傳於後裔尚賴連衡之力共輸夾輔之忠期捍禦於寇戎用匡扶於王室咨爾列辟體予至懷故茲詔示想宜知悉

賜檢校少保光山軍節度使知大宗正事士儂
乞收叙銜在令時下允詔

勅士儂省所奏劄子乞收叙銜在令時之下事具悉卿
蚤建戚藩久司屬籍藹親賢之雅望播在搢紳惇骨肉
之厚恩稱於宗族適茲同列增用耆年雖秩異品殊固
有尊卑之次而兄先弟後願從少長之倫徐行無不悌
之譏自下得處高之道剡章來上陳義甚堅欲興廉遜
之風以勵永和之行勉成茲美式副此懷所請宜允故

茲詔示想宜知悉春寒卿比平安好遣書指不多及

賜左中奉大夫徽猷閣待制德安府復州漢陽
軍鎮撫使馬步軍都總管兼知德安府陳規獎

諭詔

勅陳規卿體國盡忠守藩稱治當中原之未定念南畝
之多荒兵食未充農功蓋少乃別營屯之制用興稼穡
之功軍民不雜而無爭畔之辭官吏不增而無加廩之
費得魯侯之重穀同漢相之留田東作西成居有安生

之計緩耕急戰人懷赴敵之心條理不煩設施可法載
觀績効深用歎嘉故茲獎諭想宜知悉秋熟卿比平安
好遣書指不多及

賜徽猷閣直學士降授左中奉大夫知鄂州荆
湖北路安撫使劉洪道獎諭詔

勅洪道省所荆湖北路監司奏契勘本路州累年以來
屢經劇寇焚劫自帥臣劉洪道到任以來方始措置整
治軍旅張大聲勢即今汭流上下並皆寧肅客旅舟船

漸見通快遠近居民各已安妥鼎澧道路文移往來悉
無限礙措置已向就緒事具悉朕惟荆漢之地鞠為盜區
荒蕪連城白骨蔽野眊焉西顧焚灼於懷謀帥屬卿往
圖綏定果能為朕寬憂一方軍聲既張鼠竊自遁叛亡
降附姦宄寢銷道梗復清江流無壅事滋就緒民若更
生究觀設施咸有成績使者言狀朕甚嘉之故茲獎諭
想宜知悉春寒卿比安好遣書指不多及

賜龍圖閣直學士左朝請大夫知湖州汪藻獎

諭詔

勅汪藻省所奏再辭免轉官恩命事具悉為國之道有勞必錄行賞必均初無間於貴近也乃者和糴之令下其奉行之敏不擾而辦者三州卿實在焉惟吾侍從之舊體國愛民固與衆異而第勞進秩姑與衆同庶乎無所偏私者乃且力辭寵命再以情言明近臣報施之宜勵君子廉耻之操諦觀所守深用歎嘉顧卿陳義若此朕亦何嫌於遷令而不以成其美哉所請宜允故茲詔

諭想宜知悉夏熱卿比平安好遣書指不多及

賜起復檢校少保定國軍節度使川陝宣撫副
使吳玠獎諭詔

勅吳玠省王似盧法原奏卿智勇絕人忠誠許國獨當
一面敢嬰金鉞之威并護四川孰睨劒門之壯屬敵師
之荐入由故道以來侵恃衆而無虞心懲前而致死力
禦茲兇焰抗以孤軍畫出鏖兵既殺傷之過當夜潛擣
壘遂折北而不支委仗如山積尸成觀首渠各遁營柵

盡平覽三捷之繼聞知百戰之良苦嘉乃績之甚偉知
我師之共勞方趣第功豈忘屢歎已降詔宣撫使司疾
速具功狀保明聞奏故茲獎諭想宜知悉夏熱卿比平
安好遣書指不多及

賜資政殿學士左中大夫江南西路安撫大
使馬步軍都總管兼知洪州軍州充德安府舒
蘄光黃復州漢陽軍宣撫使李回獎諭詔

勅李回省樞密院奏江南西路安撫大使司申契勘今

來楊勅結連山砦諸砦賊徒復欲作過焚劫州郡及陰
與江西賊首通款其楊惟忠并屬官捕斬楊勅將所管
人兵分隸邊將盡皆安帖顯見措畫有方夾輔大臣入
則制勝廟堂出則鎮安方面宿姦巨猾桀黠何為眷吾
老臣頃辭機務載勞舊德往殿江西談笑雍容叛將授
首無焦頭爛額之後收折衝厭難之功允賴壯猷寬吾
憂顧樞庭言狀深用歎嘉故茲獎諭想宜知悉春暄卿
比安好遣書指不多及

賜楊惟忠獎諭詔

勅惟忠朕以久勞宿衛備罄忠勤官掖遠行實係保護
比由章貢還次鄱陽將士同心能體朕意行雖永久無
擾吾民非總率有方何以至此眷言盡瘁深用歎嘉故
茲獎諭想宜知悉秋冷卿比安好遣書指不多及

賜皇叔祖檢校少保靖海軍節度使開府儀同
三司嗣濮王仲湜辭免兼大宗正事恩命不允
詔

勅仲湜省所奏辭免兼判大宗正事恩命事具悉朕觀
麟趾之風而念振振之族讀行葦之雅而懷戚戚之私
遭時難否之期感此散離之後肆召司屬還趨行朝庶
糾合於宗枝以固安於根本惟卿嗣承濮邸貴襲王封
屬籍既尊宗盟是賴俾總有司之務用敦同姓之恩宜
疾其馳尚何所避所請宜不允故茲詔示想宜知悉

賜皇叔祖檢校少傅靖海軍節度使開府儀同
三司嗣濮王仲湜再上表辭免宗祀加恩斷來

章不允詔

勅仲湜省所再上表辭宗祀加恩事具悉朕躬祀總章
克成熙事維時宗室之老介子酌獻之勤神視願歆祖
宗來假餞胙之福卿則同之增衍封祖厥有常典胡為
謙執猶爾遜辭渙號已孚母稽成命所請不允仍斷來章
故茲詔示想宜知悉春暄卿比平安好遣書指不多及
賜朱勝非辭免監修國史命不允詔

勅勝非省所劄子奏辭免恩命事具悉自艱難以來亂

靡有定史牒散落干戈歲興未遑編削之事雖載筆赤
墀屬書東觀官存其名而漫不舉職朕甚憫焉夫君舉
必書善惡不隱所以垂訓於後也今闕無所記者幾年
矣久或失傳後將奚考若事有過舉言有失中而不見
其迹朕亦於何而自鑒耶是用申飭厥官趣行記錄
而屬吾相臣以董成之惟卿學冠古今資兼才識從朕
初載以迄於今顧其閱歷之詳筆削之善取正多矣勉
副朕志何以辭為所請宜不允故茲詔示想宜知悉

賜新尚書右僕射同中書門下平章事朱勝非
辭免恩命不允詔

勅勝非省所劄子奏辭免恩命事具悉朕惟自昔之君
考慎其相求之夢卜蓋難約於常規拔自疏微或未明
於大體能副憂勤之託要先勞舊之圖卿嘗秉國鈞適
遭時變籠吠主之羣而無所肆暴延勤王之旅而終以
成功明辟既還左符徑去謫官四載許國一心是用悉
辨讒誣申加收召俾復歸於大任庶終濟於多虞君臣之

間情好彌篤胡為未體尚或有云往懋乃庸無留朕命
所請宜不允故茲詔示想宜知悉

賜觀文殿學士朱勝非辭免恩命不允詔

勅勝非省所上表辭免恩命事具悉朕以中原離隔外
虞未寧政賴故弼大臣分處藩屏庶幾折衝坐鎮增重
本朝卿襟度恢闊謀猷深遠儀形維舊人所具瞻起於
公務退閒之中付以師帥撫綏之任既隆體貌斯極寵
名祕殿清班時乃舊物卿能副朕眷倚往疾其驅而茲

恩典之常奚足謙避亟祇成命以徇輿情所請宜不允
故茲詔示想宜知悉夏熟卿比安好遣書指不多及

賜觀文殿學士左宣奉大夫知紹興府事充兩
浙東路安撫使朱勝非辭免新除同都督江淮
浙諸軍事恩命不允詔

勅勝非省所劄子奏辭免恩命事具悉朕觀吳晉之主
崛興江左陸遜王導皆以佐命大臣督中外之師所以
尊王室而威諸夏蓋有在也前屬元宰有八路之行顧

朝廷之上不可虛位肆令召還以遙制於中且命卿以故相之重往臨於外庶表裏相與戮力共濟艱虞朕豈樂夫遷令易制以數勞吾舊德為哉安危之計正需卿等有不得已耳昔人以一士止百萬之師一賢制千里之難非卿則孰任此尚疾其驅毋復堅避所請宜不允故茲詔示想宜知悉秋涼卿比平安好遣書指不多及賜觀文殿學士左宣奉大夫知紹興府朱勝非乞改一外任宮觀差遣不允詔

勅勝非省所劄子奏乞改授一外任官觀差遣事具悉
卿嘗秉國鈞比更藩翰肆圖人望召付兵權而乃力貢
忱辭願回成命莫副急賢之用獨深將母之懷朕鑒乃
誠重勞舊德爰止趣行之使已頒改命之書還政近邦
俾諧私欲尚資綏靖得緩顧憂閒退之求則非朕意所
請宜不允故茲詔示想宜知悉秋涼卿比安好遣書指
不多及

賜朱勝非辭免依舊知紹興府乞除授一外任

宮祠差遣不允詔

勅勝非省所劄子奏辭免依舊知紹興府恩命乞除一
外任宮祠差遣事具悉朕以天步猶躋邊虞未靖思時雅
望為國折衝圖舊弼以臨戎督全師而開府煩言遽至
成命遂遷顧東道之要藩實行朝之近屏用還其故亦
便乃私矧禮義不愆縱多言而奚恤且君臣無間於大
體而何傷朕固循愛人以德之規卿其盡事君以忠之
道乞聞之語非朕欲聞所請宜不允故茲詔示想宜知

未諭厥旨遂求閒便繼閱來奏良用憮然式迨其歸申
頒前命庶幾奉祠琳館進讀金華且無職事之煩而得
話言之益朕之初意若此卿尚何云所請宜不允仍不
得再行陳請日下起發前來赴行在供職故茲詔示想
宜知悉秋涼卿比安好遺書指不多及

賜端明殿學士左朝奉大夫江南西路安撫大
使兼知洪州趙鼎乞除一宮觀差遣不允詔

勅趙鼎省劄子乞除一宮觀差遣事具悉朕惟輔弼舊

臣誼當體國蕃宣要地務在得人自東徂西由近及遠
寬朕憂顧在卿撫綏方入境之云初諒徧邦之咸喜胡
為引疾乃欲求閒蓋嘗即卿所陳察卿已試請於朝則
以軍儲為急言於朕則惟民力之憂用屬察則取州縣
之實才勤官政則親米鹽之細務第如故治端本成功
卿若辭難人誰任事勉思深眷毋復多云所請宜不允
故茲詔示想宜知悉夏熱卿比安好遣書指不多及

賜新除叅知政事趙鼎辭免恩命乞政除一在

外宮觀差遣不允詔

勅趙鼎省所劄子奏辭免恩命事具悉朕以臨政之未
明求賢而自輔深戒取人之失選於衆而敢輕承懷用
舊之宜簡諸心而素定率由公聽庶協僉諧卿以直道
正言歷躋憲府以嘉謀碩畫嘗贊籌帷名聲推重於朝
廷風采聳聞於天下屬虛近弼思究遠猷乃趣召於帥
藩俾參陪於國論惟君臣之遇合昔以為難而政事之
圖維今尤匪易卿方得位朕所委心勉戮力於治功毋

執謙於辭遜所請宜不允故茲詔示想宜知悉

賜新除簽書樞密院事趙鼎辭免不允詔

勅趙鼎省所劄子奏辭免新除簽書樞密院事恩命事具悉卿操術端純性資忠鯁自居風憲力振綱綱糾彈罔避於權彊慷慨直當於仇嫉忱誠無隱剛毅不回朕察其用心既已計從而言聽驗之行事庶克危持而顛扶肆擢贊於中樞俾叅聯於近輔籌帷畫策方需留侯借箸之忠叛國寢謀仰賴汲黯在朝之望朕心虛佇物

論乞諧遽覽奏陳猶形遜避其趣祇於位著以共濟於
艱難所請宜不允故茲詔示想宜知悉

賜叅知政事趙鼎乞罷范冲宗正少卿直史館
除命不允詔

勅趙鼎省所劄子奏新除宗正少卿直史館范冲係臣
姻家伏望罷冲除命事具悉朕惟神宗哲宗兩朝史錄
更京卞之手筆則是非多其私意傳之後世實損盛德
方詔有司俾加更定載念當時直筆之臣今皆逝矣而

祖禹之子在遺範未泯召用為宜矧列職宗卿乃其舊
物而紬書史館則彼世官斷於朕心可因卿廢昔祁奚
內舉猶不避子而祐甫除吏亦多所親顧今事匪自卿
夫何嫌者勉循公道毋執謙辭所請宜不允故茲詔示
想宜知悉



金定四庫全書

卷九

欽定四庫全書

集部

北海集卷十二

詳校官右中允_臣薩敏

主事_臣呂雲棟覆勘

謄錄監生_臣劉皆

欽定四庫全書

北海集卷十

宋 蔡宗禮 撰

詔

賜左朝奉大夫試吏部尚書兼侍講胡松年乞
除一在外宮觀不允詔

勅松年省所奏乞除一在外宮觀事具悉卿以通方之
學周物之才歷事三朝越跡八座奉輜軒之使而君
命不辱冠從橐之班而時論盡傾方坐執於銓衡且入

陪於勸講實資策慮以濟難虞顧夙夜之宣勞偶陰陽之爽裕俾從優告宜即有瘳毋辭曳履之勤難徇抗章之懇所請宜不允仍給寬假將理故茲詔示想宜知悉

賜新除端明殿學士川陝等路宣撫處置等副使王似辭免恩命不允詔

勅王似省所奏辭免恩命事具悉朕濡滯東巡尚留警蹕勤勞西顧孰共憂虞肆求任重之才就副撫戎之寄惟卿數更邊閫士安寬猛之宜久治蜀都人詠中和之政

迨茲已試用以不疑朕命甫通羣情應悅忽披忱奏猶
執謙辭蓋優寵儒臣進班聯於秘殿而盡護諸將俾節
制於全師非以私卿庶其卻敵徃殲乃力庸副朕懷所
請宜不允故茲詔示想宜知悉夏熟卿比平安好遣書
指不多及

賜資政殿學士左通奉大夫川陝宣撫使王似
乞一宮觀差遣不允詔

勅王似省所奏乞一宮觀差遣事具悉朕遭時不幸德

薄力難不能固守中原而遠臨江表眷惟秦蜀時則本
根之地間者託非其人謀之不競以有富平之役師徒
潰畔土壤侵削岐梁之交連歲受兵怒然西顧為之旰
食是用因卿慶陽之效酌彼蜀人愛慕之情俾代宣威
果能扞敵方茲委重倚以成功捷書既聞遽求閒退豈
朕之不明不足以盡力歟不然卿何欲去之速也矧所
資者宿望所貴者壯猷庶幾精神之折衝豈以筋力而
為禮勉近醫藥毋復有云所請宜不允故茲詔示想宜

知悉夏熱卿比安好遣書指不多及

賜新除資政殿大學士知溫州范宗尹辭免恩
命乞依舊宮祠不允詔

勅宗尹省所奏辭免資政殿大學士知溫州恩命乞依
舊宮祠事具悉朕降登承弼稽法祖宗雖上印均勞既
中辭於機柄而分符共理猶外寄於藩宣蓋將倚重其
德名非以課功於吏事嘉我鈞衡之舊即安山海之游
載想英風出處獨由於公道還觀素節比周罔見於私

交初不自明久斯可覆是用起之間館付以便邦稍陞
秘殿之華始正輔班之體乃緣寵命荐列忱辭矧進退
大臣朕有不得已者而鋪陳往咎卿何念之深耶雖抱
志而未伸豈酬恩之無日體茲深眷毋復多云所請宜
不允仍不許再有陳請故茲詔示想宜知悉秋熟卿比
平安好遣書指不多及

賜新除通議大夫守尚書右僕射同中書門下
平章事進封高平郡開國侯范宗尹辭免恩命

不允詔

勅宗尹省所上劄子奏辭免恩命事具悉自禍結遠夷
歲甚一歲長驅南牧遂濟于江吳越荆湘咸被其酷迫
今歸寇猶據淮壩肆暴窮兇窺我未已朕雖痛心疾首
嘗膽枕戈蓋未知其攸濟也重念輿圖滋削國步愈艱
顧瞻中原孰與戮力則凡治軍旅制國用撫百姓攘四
夷一相之圖朕敢輕付虛位逾月實難其人維卿天畀
瓌材自負國器由布衣策試之日蓋常陳愛君憂國之

言方壯年進用之時固舊倚有德老成之望擢陪大政亦稔具瞻求之在廷無出其右制麻初布歡然一詞胡為逡巡猶欲退避卿而不可尚誰可者亟安厥位以副所期所請宜不允故茲詔示想宜知悉

賜龍圖閣直學士左朝請大夫知湖州汪藻再乞除在外宮觀差遣不允詔

勅汪藻省所奏再乞除一在外宮觀差遣事具悉卿厭直承明出臨便郡奉三年之最將訖外庸披再至之辭

薦陳中惓願歸印綬祈領宮祠俯惟私室之情雖欲從
於閒佚顧在公家之計正深賴於循良繫乃爾臣體予
德意姑少安於所守以終惠於斯民所請宜不允故茲
詔示想宜知悉夏熟卿比平安好遣書指不多及

賜新除兵部侍郎兼權直學士院汪藻辭免恩
命乞除一在外宮觀差遣不允詔

勅汪藻省所奏辭免恩命事具悉卿以雋望通才獨當
瑣闥以英詞大筆兼直鑾坡從朕于難閱時最久眷言

勤勩姑俾序遷乃因移疾以家居遂欲投閑而遠引載
披來請殊拂朕心矧進貳夏官非有甚繁之務而留居
翰苑方資爾雅之文其即欽承毋勞遜避所請宜不允
故茲詔示想宜知悉

賜新除兵部侍郎鄭滋辭免恩命不允詔

勅鄭滋省所奏辭免恩命事具悉朕閱國多虞思人共
乂載念賢能之遠敢忘寤寐之求惟卿進歷三朝備更
衆事南臺西省咸見推稱絕徼遐方久嗟流落肆頒名

節還貳司戎庶收未究之才克助有為之志茲聞新命
猶欲就閒雖辭遜之可觀豈難難之所望尚毋謙執其
即來朝所請宜不允故茲詔示想宜知悉春寒卿比安
好遣書指不多及

賜左朝議大夫試尚書吏部侍郎鄭滋乞除知
州或外宮觀不允詔

勅鄭滋省三省進呈所乞除知州差遣或在外宮觀一
次事具悉卿蚤以美才發聞庠序出入侍從見謂老成

召自遠方歷躋省戶允賴清通之目庶幾銓序之平曾
未暮年方觀成績胡為引疾遽欲外遷宰輔以聞殊非
朕意顧政事外修之際惟人材難得之憂姑安厥官毋
懷謙退所請宜不允故茲詔示想宜知悉

賜起復檢校少保光山軍節度使知大宗正事
士懷上表辭免宗祀加恩不允詔

勅士懷省所上表奏辭免宗祀加恩事具悉朕以王室
未寧公族零散夙夜惴惴惟所以惇睦而親厚之無敢

不至也矧合宮均慶恩加庶邦而卿以同姓之賢司宗盟之籍餽胙之福宜在所先增邑廣封時乃彝典匪朕私惠毋用深辭所請宜不允故茲詔示想宜知悉夏熟卿比安好遣書指不多及

賜檢校少保光山軍節度使司知太宗正事士儂乞罷宗正職事除一外任宮觀不允詔

勅士儂省所劄子奏乞罷宗正職事除一外任宮觀事具悉卿頃以宗英典茲屬籍方敵師之大入率近族以

南遷隔濶五年流離萬里諒備更於艱險每深念於勤勞幸此小康載加趣召嘉介圭之來覲覽需奏之上聞願解攸司少休閒館顧憂未忘於多壘則勢有重於維城欲彰惇睦之風正賴表儀之舊勉安乃職庸副朕懷所請宜不允故茲詔示想宜知悉

賜徽猷閣直學士知鄂州劉洪道辭免特轉左太中大夫恩命不允詔

勅洪道省所奏辭免恩命事具悉人臣効官初無擇事

朝廷制爵本以勸功維鄂渚之要衝實荊湖之都會數
被兵火鞠為墟榛謀帥維難得卿以往甫涉暮年之久
寢觀衆敝之修城堞一新軍民咸附營屯既列盜賊自
奔欲必踐於成言乃特加於信賞朕無遷令卿勿固辭
所請宜不允故茲詔示想宜知悉春暖卿比平安好遣
書指不多及

賜資政殿大學士左中大夫提舉臨安府洞霄
宮王綯辭紹興府恩命乞依舊宮祠終滿此任

不允詔

勅王綯省所劄子奏辭免恩命事具悉朕慎圖舊弼分
殿大邦資雅望之折衝庶增隆於國勢即便安而為政
用優寵於耆英綸命既孚師言惟穆遽披需奏備控忱
辭顧政府周旋嘗處具瞻之地則帥庭靜治可收坐鎮
之功諒不至於勤勞亦何煩於遜避亟祇乃事庸副朕
懷所請宜不允故茲詔示想宜知悉秋冷卿比安好遣
書指不多及

賜資政殿大學士左中大夫知紹興府王綯乞
除依舊外任宮觀不允詔

勅王綯省所劄子奏乞除依舊外任宮觀事具悉朕惟
方面之地勢有輕重股肱之臣義同休戚眷彼近邦之
要屬於舊輔之良列辟視其表儀行朝倚為根本方資
鎮靜得緩顧憂乃貢需章願休閒館雖雅懷知止自安
身退之謀然多士聞風孰共時難之慮矧神明之尚壯
且條教之既孚毋復告勞為予卧治所請宜不允故茲

詔示想宜知悉春暖卿比平安好遣書指不多及

賜資政殿大學士左中大夫知紹興府王絢再
乞除依舊外任宮觀不允詔

勅王絢省所再上劄子奏乞除依舊宮觀事具悉朕以
天時少康邊候無警方內修於庶政其力復於丕基雖
紀律設張本朝廷而出治然詔條宣布繁郡邑之承流
維彼近藩屬吾舊德正有賴同心之助乃繼陳引疾之
私若耆宿大臣咸欲奉身而去事則疎遠下吏孰肯捐

軀而赴功卿猶服勤人敢自逸矧師庭安靜初無戎務之繁而郡政寬平已見民心之悅但資坐嘯何至賢勞朕意不移卿辭無費所請宜不允故茲詔示想宜知悉春暖卿比平安好遣書指不多及

賜新除龍圖閣學士依前樞密院都承旨章誼
辭免恩命不允詔

勅章誼省所奏辭免恩命事具悉朕聞古者以禮使臣量才授職禮不備則是待人以犬馬才不稱則將假人

以罷名緩急何由而盡心爵祿亦無以勵世謹守茲戒
朕焉敢私卿學粹而通經識明而知務貳劇曹於蘭省
承密旨於樞庭左右其宜周旋匪懈欲加煩使爰錫徽
章顧內閣之聯河圖為重而學士之選寓直則輕俾超
綴於新班用增華於舊任蓋將有待尚何可辭所請宜
不允故茲詔示想宜知悉

賜新除龍圖閣直學士章誼再辭免恩命不允
詔

勅章誼省所奏再辭免恩命事具悉朕以強敵欲和擇才充使必得一時之雋繼圖二國之成顧孰可行獨卿稱首肆分盼於寵渥以顯示於光華苟懷利事君卿固所當戒者而不遑將母朕其何以慰之況延閣之序遷亦從班之常數惟朝廷之爵祿本以勸功體臣下之勤勞可無加禮亟祇成命勿復固辭所請宜不允故茲詔示想宜知悉

賜龍圖閣學士左中大夫樞密院都承旨充大

金國軍前通問使章誼辭免特賜起發錢一千貫銀絹二百疋兩恩命不允詔

勅章誼省所奏辭免特賜錢一千貫銀絹二百疋兩恩命事具悉卿暫遠親顏出從王事靡見幾微之色備聞激切之誠然自歷修途既有齋裝之費而還觀私室豈無服用之需載軫朕懷是加茲錫初非妄予奚足深辭所請宜不允故茲詔示想宜知悉

賜新除工部侍郎李擢辭免恩命不允詔

勅李擢省所奏辭免恩命事具悉朕惟為國之務邪正
必分用人所先內外孰急肆簡論思之舊俾遷侍從之
班卿華國有文事君無隱排宿姦於朋黨蔽朝之際德
音甚明叅書命於難踐祚之初典冊具在頃辭青瑣
再易朱幘惟疾惡以如仇故遭讒而屢絀察孤忠之可
近乃趣召以來歸顧文昌六職之聯共裨庶政而起部
百工之事姑試長才尚疾其驅毋復堅避所請宜不允
故茲詔示想宜知悉

賜尚書工部侍郎兼權侍講李擢乞除僻小一郡或在外宮觀不允詔

勅李擢省奏乞除一僻小郡或在外宮觀差遣事具悉朕求士雖廣用人敢輕除目甫行待僉諧而得下周行並進察衆好而始安僅有獲焉可謂難矣如卿藝文之富議論之公卓爾不羣高映一時之望慨然有意每懷當世之憂還寘近嚴是資裨益方佇燕閒之款遽辭侍從之勞用實甚難去其可易勉據素蘊毋惑他虞所請

宜不允故茲詔示想宜知悉

賜新除徽猷閣直學士依前知德安府陳規辭

免恩命不允詔

勅陳規省所奏辭免恩命事具悉朕惟賞當功則人情
勸名當實則爵秩重礪世之具無以易此卿秉心忠誼
更陟難危遠守孤城兼提兩郡務農脩備屢却重圍載
省勤勞爰加進寵峻升學士之職俾為文吏之榮顧惟
此遷功實並當亟祗成命毋復勞辭所請宜不允故茲

金史卷一百一十五
卷十
詔示想宜知悉春暖卿比安好遣書指不多及

賜新除龍圖閣直學士折彥質辭免恩命并召
赴行在乞除在外宮觀不允詔

勅彥質省所奏辭免恩命事具悉卿蚤由才諳嘗綴近
嚴擅邊境之功世高將闕服詩書之教名在儒科豈伊
一眚之為尤乃與遠圖而并棄肆還近職趣赴行朝盡
滌前辜將觀後効緬惟忠誼宜自激昂忽披來諭之誠
殊失所期之素矧湖湘謀帥已繼錫於贊書則江海就

閑可輒安於祠館往祗朕命毋費乃辭所請宜不允故
茲詔示想宜知悉

賜資政殿學士左中大夫謝克家辭免提舉萬
壽觀兼侍讀恩命不允詔

勅克家省所劄子奏乞除一宮觀差遣事具悉朕以憂
勤之暇縱觀詩書執禮之言顧惟閒燕所親必有直諒
多聞之士肆求鴻博以副詳延卿道學精深性資端粹
嘗入陪於大政方移守於近藩屬此來朝載嘉敷奏與

其外更符竹徒勞劇郡之煩曷若留寘經帷式款話言之益弗縻吏職俾食真祠韋平之輔漢朝本由經術褚馬之逢唐主蓋以耆儒卿實兼之人誰議者亟祇成命毋飾謙辭所請宜不允故茲詔示想宜知悉

欽定四庫全書

北海集卷十一

宋 綦崇禮 撰

詔

賜新除禮部尚書謝克家辭免恩命不允詔

勅克家省所奏辭免禮部尚書恩命事具悉士大夫平居積學厲志窮古今治亂之源豈徒疲精思於陳言之末哉蓋將以有為也今中原淪沒國步阽危政資其人相與戮力如卿道德純備見聞殫洽謀謨議論維時所

需以疾去朝滯於遠郡肆從收召還長春官庶幾諮詢
可聞至策夫干戈之際固俎豆之未遑然揖遜之間亦
征誅之所寓往祇乃職毋事勞辭所請宜不允故茲詔
示想宜知悉

賜資政殿學士左中大夫提舉萬壽觀兼侍讀

謝克家辭免新除男伋工部郎官恩命不允詔

勅克家省所劄子奏辭免新除男伋工部郎官恩命事
具悉朕以伋學蚤傳家允為令器仕能舉職嘗攝名郎

乃由司屬之聯俾正列星之位是惟才選宜以序升甫
嘉濟美之賢遽覽辭榮之請念前載教忠之誼固將勉
其事君稽昔人舉善之公猶靡嫌於稱子矧卿久離政
地方領閑官而仍特出朕知匪由卿故初無他議何用
謙辭所請宜不允故茲詔示想宜知悉

賜檢校少保定國軍節度使川陝宣撫副使吳
玠辭免新除少保恩命不允詔

勅吳玠省所奏辭免恩命事具悉卿勇畧無前威名有

素挈兵百戰每聞三捷之功扞寇四川獨倚一軍之重
隱如敵國賢甚長城自建將旄載更歲籥四舉旌勞之
典爰頒進律之恩增賁元戎陞華亞保是姑從於常數
方繼冊於茂勲其即欽承毋多辭遜所請宜不允故茲
詔示想宜知悉夏熱卿比平安好遣書指不多及

賜檢校少保鎮西軍節度使涇原秦鳳路經畧
安撫使馬步軍都總管兼知秦州軍州事兼管
內勸農使充陝西諸路都統制兼宣撫處置使

司都統制兼利州路階成鳳州制置使節置使
龍州吳玠乞罷都統制職事別差官主管不允
詔

勅吳玠省所奏乞罷都統制職事別差官主管事具悉
卿以頗牧之才關張之勇盡護諸將獨殿一方鏖兵苦
戰則大敵為殲據險守堅則嚴師莫犯功存巴漢威動
羌夷克寬西顧之憂實賴外攘之力方盼廷號增重軍
容兼隆制使之名進假孤卿之秩忽披亟奏祈解兵權

顧戎事之未寧正邊防之當備卿而辭疾誰與赴功其
勉務於協心以無忘於體國所請宜不允故茲詔示想
宜知悉春寒卿比平安遣書指不多及

賜徽猷閣直學士左中大夫提舉江州太平觀
洪擬辭免特轉太中大夫恩命不允詔

勅洪擬省所奏辭免進書轉官恩命事具悉朕惟銓選
久敝格律寢墮蓋多隨事以建明寧免臨文而抵牾乃
并包於新舊俾衷綴於科條惟討繹之加詳肆編摩之

亟就可緣在外輒廢前勞信賞已行謙辭毋固所請宜
不允故茲詔示想宜知悉春寒卿比平安遣書指不多
及

賜新除徽猷閣直學士提舉江州太平觀洪擬
辭免恩命不允詔

勅洪擬省所奏辭免恩命事具悉卿仕閱四朝位登八
座外歷專城之寄中更持橐之勞迨此請閑可無加寵
寓西清之禁直仍列從班貢學士之榮名式彰儒效俾

從優佚曾靡疵瑕第深體於恩私亦奚煩於遜避所請
宜不允故茲詔示想宜知悉冬寒卿比安好遣書指不
多及

賜試禮部尚書洪擬辭免轉官并減磨勘不允
詔

勅洪擬省所奏辭免恩命事具悉日者甌粵有征王師
大舉海浮陸進分自永嘉凡老弱之在行悉留居以俟
給卿方守是郡主其資餉倉卒趣辦不加色辭使戰士

無內顧之懷而齊民免侵漁之擾凱旋軍罷厥績茂焉
惟責實在卿則功將孰賞毋辭命渥式勸庶邦所請宜
不允故茲詔示想宜知悉

賜新除禮部尚書洪擬辭免恩命不允詔

勅洪擬省所奏辭免恩命事具悉卿中違省戶出剖郡
符允資共理之良已報暮年之政顧瞻班列思見老成
雖殿彼一邦方安良翰而典茲三禮宜屬耆儒趣還常
伯之聯俾正秩宗之任當軍旅而陳俎豆之事固曰未

遑披荆棘而立本朝之儀乃其所急勉推舊學來副詳
延成命不移謙辭奚取所請宜不允故茲詔示想宜知
悉冬寒卿比安好遣書指不多及

賜新除吏部尚書兼翰林學士沈與求辭免恩
命乞除一在外宮觀不允詔

勅與求省所奏辭免恩命乞除一在外宮觀事具悉卿
歷更言路進長憲臺紃彈不避於貴權建明有補於當
世賢勞滋久宜在褒陞顧自元豐而來御史中執法蓋

以天官常伯北門學士為美遷惟卿材識疏通辭章瞻
蔚政事文學之選見謂兼長並命兩官以為優寵退閒
之請非朕所望往體眷意勿復牢辭所請宜不允故茲
詔示想宜知悉

賜新除龍圖閣學士充荆湖南路安撫使兼知
潭州沈與求辭免恩命乞一在外宮觀不允詔
勅與求省所奏並辭免恩命乞一在外宮觀事具悉朕
以湖湘之南寇攘頻擾兵革之後儆備未休爰咨近臣

往鎮方面維卿歷居臺省每陳憂國之言久侍軒墀與
識愛民之意察其可用何所不宜雖銓衡得人無若山
濤之比然詩書取帥誰居卻穀之先肆分藩閭之雄并
寵河圖之峻顧中外迭任乃國朝之舊章而險夷一心
亦臣子之常分胡為有請自託不能惟付予之甚竊宜
忱誠之弗亮尚其深體毋復多云所請宜不允故茲詔
示想宜知悉

賜吏部尚書兼權翰林學士沈與求辭免兼侍

讀恩命不允詔

勅與求省所奏辭免兼侍讀恩命事具悉朕思又時難
若稽古典維始終念學捨斯道則安從顧直諒多聞需
其人而自近卿頃司風憲有聾諤之言今執銓衡得公
方之譽代予述作溢于文辭蓋學貫穿而不窮故才縱
橫而皆可進兼勸讀亦便咨詢勉迪我於大猷姑畧卿
之小節亟祇成命毋事謙辭所請宜不允故茲詔示想
宜知悉

賜新除翰林學士知制誥徐俯辭免恩命不允

詔

勅徐俯省所奏辭免恩命事具悉學士之職非獨以文翰待命禁林而深謀密議或預叅決號稱內相尚矣我祖宗優禮詞臣退朝燕閒猶多召見從容顧問克廣聰明而數十年來官因人廢書詔之外無所預聞分釐院務殆與外司等耳朕甚惜之卿以豪傑之才老成之望比躋諫省數對于中嘉其告猷宜在茲選庶幾興復之

功兼賴腹心之助且使故事因卿而存豈特號令文章
需其用哉益體眷知毋煩謙避所請宜不允故茲詔示
想宜知悉

賜端明殿學士左中大夫新除提舉臨安府洞
霄宮徐俯辭免依舊職名不允詔

勅徐俯省所奏劄子辭免依舊職名事具悉朕惟功名
之士樂朝廷高尚之人輕軒冕用之弗及則琬琰有煨
塵之歎去而不顧則山林無廊廟之殊蓋出處之累靡

留於心故榮顧之情莫見於色卿之遇合朕所簡知有不得於重輕之間遂自決於進退之際身已江湖之遠名奚禁殿之嫌往體眷懷毋煩謙遜所請宜不允故茲詔示想宜知悉夏熱卿比平安好遣書指不多及

賜新除簽書樞密院事徐俯辭免恩命不允詔勅徐俯省所劄子奏辭免恩命事具悉朕焦勞願治物色求賢庶由多難以興邦思得非常之奇士頃召卿于閒遠初未覲於儀形擢在七人居纔五月正言慷慨盡

拾遺補過之忠燕見從容多畫策含奇之助察其可用
寧復計資視草奚為姑假途於鑾禁運籌有賴俾列位
於樞庭曾無累日之淹式表一時之過期大攄於素蘊
以共濟於康功謙遜之辭卿其毋執所請宜不允故茲
詔示想宜知悉

賜新除叅知政事席益辭免恩命不允詔

勅席益省所劄子奏辭免恩命事具悉朕以神州猶梗
天步未夷併力合謀方聖哲共勞於馳騫興衰撥亂豈

眇冲獨濟於艱難肆求真才同翊大政頃得卿於遠外
已屬意於今茲遭謗去朝謫官經歲迨還侍從彌見周
旋進列六卿既稔隆於物望入陪四輔宜叅執於事樞
覽君臣遇合之言察心體相同之誼卿其盡道朕則知
人尚恢復古之圖毋徇好謙之節所請宜不允故茲詔
示想宜知悉

賜新除工部尚書席益辭免恩命不允詔

勅席益省所奏辭免恩命事具悉卿世有令名蚤躋華

貫歷代言於兩禁更共理者五州身數器而有餘才兼人而不匱頃被賜環之命載聯持橐之榮執銓衡而姦欺之迹靡容奉勸講而補益之言屢至審堪還用寧憚亟遷維時六卿實亞二府有以德舉不由序升姑進掌於冬官尚委成於選事并圖乃績豈曰朕私其即欽承毋勞遜避所請宜不允故茲詔示想宜知悉

賜新除吏部侍郎席益辭免恩命不允詔

勅席益省所奏辭免恩命事具悉自南渡以來典籍散

亡而銓選之法敝有司隨事建明以補苴罅漏而條目亦已粗舉任職者不知省無所操執以杜吏姦乃徒沽譽一時務先人情而忽防檢故法益玩姦益生士皆趨利目前有苟得之風而將來者殆不可繼其敝為甚維卿學知大體智周小物見于已試舊矣肆命卿典茲左選庶幾懲乎前而善其後使吏無容姦而士不失職所優為耳夫尚何辭所請宜不允故茲詔示想宜知悉

賜新除寧武軍節度使開府儀同三司劉光世

辭免恩命不允斷來章詔

勅光世省所劄子奏辭免恩命事具悉人君之御下欲
勸於用賞人臣之事上常悅於見知卿世有威名久宣
忠力執干戈而入衛實維虎臣冒矢石以先登允稱鷹
武既茲獻馘因俾策勲六纛先驅換戎旃之名鎮三槐
在著視衮職之盛儀粗答元功少馭衆望胡為謙挹乃
爾逡巡顧屬任之方隆且敵師之猶偪其體難難之託
勿循遜避之常所請宜不允緣大敵在近浙西闕人措

置難依常制辭免仍斷來章故茲詔示想宜知悉

賜起復檢校太傅寧武寧國軍節度使開府儀
同三司充江南東路宣撫使劉光世辭免特賜
銀一千兩恩命不允詔

勅光世省所奏辭免特賜銀一千兩恩命事具悉卿以
將相大臣寄國重任銜哀怙恃再更大憂雖喪事盡力
無所憾者顧禮遇之厚隱卹之深體貌既隆情文當稱
則常賻之外朕獨不能少致其私乎為費幾多何辭之

有所請宜不允故茲詔示想宜知悉夏熱卿比平安好
遣書指不多及

賜新除起復檢校太傅寧武寧國軍節度使開
府儀同三司充江南東路宣撫使劉光世辭免
恩命不允詔

勅光世省所奏辭免起復恩命事具悉卿甫易師屯繼丁
家難顧銜哀茹痛永懷怙恃之憂而禦侮折衝方任安
危之寄以邦家之大計奪苦塊之至情義有所先事非

獲已謂能體悉姑徇權宜乃控孝誠願從喪制雖孺子之慕正切於思親然大臣之心可忘於慮國勉從變禮毋復牢辭所請宜不允仍依已降指揮日下供職不許再有陳請故茲詔示想宜知悉夏熱卿比安好遣書指不多及

賜新除檢校太傅依前起復寧武寧國軍節度使開府儀同三司充江南東路宣撫使劉光世辭免恩命不允詔

勅光世省所劄子奏辭免恩命事具悉朕以將聞之臣
勤勞既久帝傳之位品秩為尊假之此名時惟其稱卿
望高閭閻勲載旂常兼兩鎮之旌旄視三司之儀物顯
榮已盛倚注方深屬煩江右之行欲示軍中之寵肆出
揚廷之命用陞絕席之班國典有常師言維穆毋多遜
避其即欽承所請宜不允故茲詔示想宜知悉

賜太尉奉國軍節度使御營副使劉光世乞一
便郡差遣或守本官致仕不允詔

勅光世省所奏乞一便郡差遣或守本官致仕事具悉
朕遭時艱運注意將臣欲圖興衰撥亂之功實藉禦侮
折衝之任卿忠誠許國勲烈傳家久宣軍旅之勞屢載
旂常之績比出屯於江次實橫制於敵人頻襲歸師多
俘醜類威名既震他盜悉平爰需吉甫之來歸以仗汾
陽之再造乃願分於符竹且欲治於菟裘顧國步之若
斯豈謀身之當爾遽披來請良拂朕心所請宜不允故
茲詔示想宜知悉夏熱卿比安好遣書指不多及

賜劉光世再辭免起復恩命并乞回納賻贈及
特賜銀絹並不允詔

勅光世省所奏再辭免起復并乞回納賻贈及特賜絹
銀等事具悉朕惟將相大臣股肱同體家雖遭變時亦
多虞念創鉅痛深方斬焉而在疚然主憂臣辱豈忍爾
而忘懷毋恤小嫌勉從大誼亟祇成命期雪深讐若賻
典之稍加示眷私之特異曾無多費何用牢辭所請宜
不允故茲詔示想宜知悉夏熟卿比安好遣書指不多

及

欽定四庫全書

北海集卷十二

宋 綦崇禮 撰

詔

賜劉光世再辭免恩命不允詔

勅光世省所奏再辭免恩命事具悉卿以上將之重作鎮方面折衝敵愾厥績茂焉肆酬賢勞加榮雙節而卿深戒滿盈過自抑畏忱辭薦至益見勤誠夫惟富而不驕貴而能降負功名而不伐則福祿長久之道在卿勉

之寵命已行勿復固避所請宜不允故茲詔示想宜知悉秋熟卿比安好遣書指不多及

賜劉光世再辭免恩命不允詔

勅光世省所再上劄子奏辭免恩命事具悉朕以安危之計寄於二三將帥之臣既命世忠出營淮泗則夫建鄴上游之地非時偉望其孰鎮之惟卿忠誼世濟勲名並高茹痛銜恤起從戎事家讎國患寧忘厥圖發號移屯軍聲益振固已威宣萬里之外矣方茲委重宜有寵

行顧將相之官已登極品則帝傅之秩姑示褒崇往體
眷懷毋煩堅避所請宜不允故茲詔示想宜知悉

賜劉光世三上劄子辭免恩命不允詔

勅光世省所三上劄子辭免恩命事具悉卿結髮從軍
蓋踰二紀以身許國殆歷百危惟盡瘁於艱難豈容心
於高顯但念重勞宿望共集遠圖宣威還控於江東制
敵密連於淮上庶幾表裏協濟事功方茲臨遣之初爰
錫寵行之數肆頒廷號時乃邦彞成命已孚謙辭毋固

所請宜不允仍不得再有陳請故茲詔示想宜知悉

賜新除叅知政事張守辭免恩命不允詔

勅張守省所奏劄子辭免新除叅知政事恩命事具悉
頃以胡騎長驅直侵江表乘輿遠播至涉溟波所賴二
三之臣左維右挈迨茲旋蹕用克無虞惟卿以直道忠
言進聯樞輔謀謨協贊為力居多念國步之益艱而興
圖之滋削政需賢哲以捄顛危卿有經濟之才而未克
大施有忠嘉之畧而未克盡用肆輟本兵之務俾陪機

政之繁式資獻可替否之忠庶成興衰撥亂之績過形
謙避非朕所聞其殫夙夜之勤以赴功名之會所請宜
不允故茲詔示想宜知悉

賜新除資政殿學士左中大夫知福州張守辭
免恩命乞除一在外宮觀不允詔

勅張守省所劄子奏辭免知福州恩命乞除一在外宮
觀事具悉朕以甌閩之俗民物夥繁殲嗇自足安于無
事舊矣間者政或不良盜賊數起兵挈禍結頻年未定

肆興師旅往行天誅雖妖孽悉除而瘡痍未復朕甚憫
焉思得輔弼舊臣宣吾德意往臨鎮之載圖其人莫如
卿者是用輟金華之召殿此南服庶資雅望于以肅清
四境安集一方惟卿體國之誠宜識朕志以時上道勿
復深辭所請宜不允故茲詔示想宜知悉秋熱卿比安
好遣書指不多及

賜資政殿學士左中大夫知福州充福建路安撫使張守乞一在外宮觀任便居住不允詔

勅張守省所劄子奏乞除一在外宮觀任便居住事具
悉朕惟輔弼舊臣邦家良翰入居廊廟所以尊朝廷出
領麾符所以壯方岳卿頃祈去位嘗許奉祠載圖雅望
之隆起畀近邦之逸間由越府改蒞閩都布寬大之恩
能推上意戢鬪爭之暴克變素風嘉報政之甚休諒徧
邦之咸喜方茲倚重乃復求閒人將謂何卿其毋遽所
請宜不允故茲詔示想宜知悉夏熱卿比安好遣書指
不多及

賜資政殿學士左中大夫知福州充福建路安撫使張守乞除在外宮觀不允詔

勅張守省所劄子奏乞除在外宮觀事具悉朕以閩粵之區蕃宣所寄倚予舊弼得撫循鎮靜之宜惠彼疲氓息爭鬪戢敷之暴歲時再換宵旰為寬方深委注之誠重有退閑之請顧教條服習已安襦袴之恩則嘯諾雍容奚事米鹽之務諒徒資於卧治亦不至於煩勞勉體朕懷毋行卿意所請宜不允故茲詔示想宜知悉春暄

卿比平安好遣書指不多及

賜資政殿學士左中大夫知紹興府張守辭免
提舉萬壽觀兼侍讀恩命并乞外任宮觀一次

不允詔

勅張守省所奏劄子辭免恩命并乞外任宮觀一次事
具悉卿頃辭近輔繼領便藩雖政化之優流聞甚邇而
話言之益渴想於中蔽之朕心召以自近方需晝接乃
以疾陳矧琳館奉祠無吏文之拘迫而經惟進讀得燕

語之從容宜深念於多難以來裨於不逮退閒之語非朕所期所請宜不允故茲詔示想宜知悉夏熟卿比安好遣書指不多及

賜新除戶部侍郎黃叔敖辭免恩命不允詔

勅叔敖省所奏辭免恩命事具悉卿文學行義深得家傳而吏能心計特聞於世服勤仕版踰四十年名藹搢紳達於朕聽擢居瑣闥兼侍經帷議論之長見聞之洽初不自表閱試乃詳老成可親朕益自信念時方多故

而財用為急更圖往効進貳地官夫轉輸調度之宜卿
固優為之矣亟安乃職毋事謙撓所請宜不允故茲詔
示想宜知悉

賜戶部尚書兼侍讀黃叔敖乞除一在外宮觀
差遣不允詔

勅叔敖省所奏乞除一在外宮觀差遣事具悉朕紹建
丕基親用者俊資其智慮協濟艱虞頃者召卿遠方寘
之近綴歲中三命遂長地官蓋圖乃功豈其私寵矧卿

世高儒術久歷外臺諸父諸昆知名文藝者凡幾人自南自北從事金穀者凡幾任推家學之善固談經而有餘運心計之精宜豐財而不匱處之甚暇胡為告勞閑退之求卿其毋遽所請宜不允故茲詔示想宜知悉

賜新除戶部尚書兼侍讀充脩政局叅詳官黃叔敖辭免恩命不允詔

勅叔敖省所奏辭免恩命事具悉自南渡以來胡騎盜賊迭興干戈江浙荆閩之間徧罹其毒兵火所及城邑

為丘墟南畝之民靡有孑遺耗矣於斯時也乃足食足
兵知取知予地官之任其可忽耶朕比詔大臣設脩政
局講求裕國息民之策而卿以小司徒實參厥事顧老
成詳練取決為多肆命卿遂為之長以帥其屬庶幾議
論推行之際無所乖戾克就乃功朕之志也卿其勿辭
所請宜不允故茲詔示想宜知悉

賜同都督江淮荆浙諸軍事孟庾辭免恩命不
允詔

勅孟庾省所劄子奏辭免同都督江淮荆淝諸軍事恩
命事具悉朕以軍國大務內倚丞弼外責將帥而方所
病在於兵權不一莫適任患顧瞻中原孰將經理肆命
上宰以八路之督遙制於中復俾輔臣徃即師屯以為
之副庶幾表裏協濟克就遠圖維卿入贊政機出提戎
律閩湘既定江漢為清威望隱然固已折衝萬里之外
矣因其攝事申命正名式重乃權用齊衆聽非為遷次
尚何足辭所請宜不允故茲詔示想宜知悉

賜左中大夫參知政事福建江西荆湖南北路
宣撫使孟庾乞除外一宮觀差遣不允詔

勅孟庾省所劄子奏乞除在外一任宮觀差遣事具悉
朕倚重輔臣用嚴武事居則謀謨帷幄以制勝於中出
則綏定方隅以宣威於外安危所寄左右實均卿文武
兼資險夷一節入叅政柄往總戎旃旆既清甌粵之氛繼
息荆湘之暴克成朕志庸啟嘉猷方俾遄歸載圖遠畧
副三台而建府督八路以屯師遽騰引疾之辭顧有投

閒之請殊乖所望未諭乃懷宜深體於艱難勿自安於
休逸所請宜不允故茲詔示想宜知悉秋涼卿比安好
遣書指不多及

賜叅知政事孟庾辭免兼權同都督江淮荆浙
諸軍恩命并乞除在外宮觀差遣不允詔

勅孟庾省所上劄子辭免恩命乞除在外宮觀差遣事具
悉卿叅陪政事曾未閱時即總師干往平寇亂成功神
速亦既凱旋朕豈不知卿之勤勞而難留卿于中以自

輔哉屬時已盛秋當深倣備肆命卿遂副上宰移師江
次盡督諸軍比覽需章乃求閑退顧方命下已詔諭朕
旨載披來奏重以疾辭雖曰由衷而似未體國天下方
有急卿寧得避位而安耶所請宜不允故茲詔示想宜
知悉秋涼卿比安好遣書指不多及

賜叅知政事同都督江淮荆淝諸軍事孟庾乞
除在外宮觀差遣不允詔

勅孟庾省所再上劄子乞除在外宮觀差遣事具悉朕

繼統興衰任大責重所與圖回天下之事者維二三輔臣是咨是託或謀于中或勤于外如腹心股肱之相為用焉卿出撫全師淹留滋久引疾來諗豈不念勞第以將帥士卒方安卿威信而竝江淮營戍未可以弛嚴孰能代卿往任吾事雖忱辭屢至勢未得從卿其專精神近醫藥為朕緩帶而卧護之神相至忠何恙不已乞閑之語毋復以聞所請宜不允故茲詔示想宜知悉

賜同都督江淮荆淝諸軍事孟庾乞除一在外

宮觀差遣不允詔

勅孟庾省所劄子奏乞除一在外宮觀差遣事具悉朕
惟安危之計得失以人伉伉勇夫固良難於獨任齷齪
文士又不足以成功乃勞四輔之臣徃將八路之督屬
淮濱之列戍俾幕府以移屯正賴壯猷共圖遠畧云胡
引疾遽欲投閑念將相之一心用能協濟豈股肱之同
體可得自謀寬我顧憂煩卿卧護均逸之語所未欲聞
所請宜不允故茲詔示想宜知悉夏熱卿比安好遣書

指不多及

賜試兵部尚書權邦彥辭免兼侍讀恩命不允

詔

勅邦彥省所奏辭免恩命事具悉朕憂時多難克已自修親用正臣俾奉退朝之燕博觀前載以求致治之原庶資直諫之規用勉緝熙之效卿性質端厚學術深醇蓋嘗授業以為多士之模橫經而動一人之聽勸讀之益推擇是宜往思啟迪之方毋執撝謙之節所請宜不

允故茲詔示想宜知悉

賜新除端明殿學士簽書樞密院事權邦彥辭
免恩命不允詔

勅邦彥省所奏辭免恩命事具悉朕以軍國大政分畀
輔臣顧尚右武之時尤重本兵之任久虛厥次蓋難其
人卿惓惓無華靖共有守臨危徇節忠嘗至於毀家遭
變苦心慮宜深於謀國延登廊廟參與樞機僉言允諧
朕志素定方需閣議叶濟多虞胡為逡巡猶乃遜避往

勵匪躬之操共伸嘗膽之圖所請宜不允故茲詔示想
宜知悉

賜新除淮南江淝荆湖等路制置發運使權邦

彥辭免恩命不允詔

勅邦彥省所奏辭免恩命事具悉日者胡馬南寇所過
為墟荆湘江淝之間咸被其毒今防秋又偪而軍賦未
充實資才智之臣克司漕輓之事是用輟卿方面付以
六路之權庶日千金無乏大計昔史稱劉晏以民不加

賦而上用足今民力竭矣而調度方繁非心計有餘知所取予其何以任此求之庶位無以踰卿往圖足食之方以徇移忠之節逡巡退避勿事小廉所請宜不允故茲詔示想宜知悉秋熟卿比安好遣書指不多及

賜尚書右僕射同中書門下平章事秦檜為水災待罪不允詔

御筆批方時天大雨水將害粢盛宜惟宰輔罪在朕躬今秦檜抗章宜賜詔不允不得再有陳請

勅秦檜省所劄子奏為霖雨踰旬害於農畝伏望特賜
罷黜事具悉天作淫雨水潦薦臻將有災盛之害朕甚
懼焉方茲側躬以請命上帝卿誠深憂國誼切同心引
咎抗章遽求避位朕惟漢家災異為策免之文不如禹
湯罪已有應天之實朕則不德而移責股肱此何理哉
尚思變理之宜勉副焦勞之託所請宜不允仍不得再
有陳請故茲詔示想宜知悉

賜尚書右僕射同中書門下平章事秦檜之外

任宮觀差遣不允詔

勅秦檜省所劄子奏乞外任宮觀差遣事具悉朕惟大公之道責成輔弼委任不疑固欲賴其心德之同以濟大業於艱難也卿來自孤遠遂相朕躬夙夜勤勞於茲旬歲諒欲行其道以有為於當世耳胡為抗章遽求避位無乃違卿欲行之志而異朕所以責成之意哉所請宜不允故茲詔示想宜知悉

賜新除建康府撫大使兼知池州呂頤浩乞給

假將治不允詔

勅頤浩省所奏比因飲食不時遂致胃弱因傷寒變為
瘧疾伏望俯念衰殘給假將治纔候稍安即兼程起發
前去事具悉為臣之規固重於進退許國之誼宜徇於
安危乃眷元臣實勤多難扁舟徑去身雖遠於朝廷魏
闕遐瞻心諒存於王室屬此防秋之急肆先作牧之求
素志克伸何恙不已中興江表今復見於夷吾薄伐太
原尚有勞於吉甫其趣介圭之覲副茲仄席之思所請

宜不允仍依累降指揮疾速前來赴行在奏事訖之任
故茲詔示想宜知悉秋熱卿比安好遣書指不多及



